

第一名

鄭如絮

走縷

得獎感言

感謝教育部評審的肯定。

臺灣台語佇文學的路程會當正名倚起，是濟濟前輩拍拚的成果，in 為母語釘根，後進用文字繼續開枝散葉，共台語的文雅佻嬾氣代代傳湫落去。



走綫

時間、空間的錯亂，厝內、籬仔內，佇夢恰醒當中亂去矣。

趨入房間內的西照日，共彼領睏蓆炤甲燒烘烘，爇甲會當煎鹹魚矣。

鐵骨明仔，猶閣懶屍仔懶屍，無想欲反身，炤迴布簾仔的彼逝日鬚，恰沙微的目睷咧揀拚，無啥想欲擘金彼對「火眼金睛」面對天公伯仔放射的聖光。

The佇遮恰ut咧籬仔內有啥差別，精差倒的所在較闊寡仔，免受監禁的束縛爾爾。

翻一个身，記持，若像風颭前放的雨白，況咧，況咧，風紡絞雨水，況咧門窗，嘛況入毋願見光，溼澹的胸坎。

15冬矣！離開社會？閣轉來社會？阿爸無去矣！賭，荏薄甲若紙的阿母，留最後的硬氣，等我駛出法律束縛的鐵籠仔。

眼前，番薯、塗豆的田園煞成做平坦的空地仔，啥物攏無仝矣！毋但，思維愛重新洗汰，嘛愛學習無仝年代的轉換，人情生疏的變卦，世事冷薄的改變，嘛盤徙恩怨的場景……！氣魄，若像擲佇戶橫跋，一概閣一概化去的薰節仔，風一下吹，薰屎四散飛，薰頭仔咧厝埕斗鞦韆。

明仔家己問家己，是人心跋入烏暗，抑是社會本底就是一窟臭moo-moo的濁水，法律的公平秤？若像好額散，重敲片的金錢。

一場情義伸冤的選擇？抑是，勢力濫金錢盤攔的決戰？

隔一面壁堵爾爾，煞成做一條陰陽界線。一片是看無暝日，烏暗的束縛，一片是逍遙法外，自由聳勢的奸笑。參破人性的貪惡，籬仔內，煞成做無權勢、無抵抗力的懺悔所。

面對一層鎖過一層的鐵門，拖過巷路的鐵鍊仔，是行向絕望的斷腸聲，予時間麻痺去的神經線，早早就斷節矣。

法律，敢是，遮的死老百姓，耍會起的戲齣仔。人定定咧傳，「法律，是予兩種人咧奕的，一種是捌法律的，一種是有錢有勢的！」

春吉大明仔3歲，個性孽潏孽潏仔，喙tshio閣愛臭彈，兩個人自做囡仔疔，就是褲頭結相倚的司公仔象栢，好好囡仔，呔會行入烏烏雜雜的籬仔內？

鎮庄的王爺公聖誕千秋咧欲到矣，規嚟規黨的少年仔，綴宮廟炁陣頭的司公忠仔，踎廟埕排陣頭，掠乩起童操弄五寶。

有幾個仔越跳的跂步，無啥全款。明仔兩蕊目睷li-li-lut-lut，看甲攏神去矣。

越頭問春吉，彼幾個的跂步加真奢颺！

春吉雞胗開始大力歎矣。

「明仔若欲講甲你捌hooH，恁爸都頭毛喙鬚白，怙怙仔看啦，毋通去犯著神明khia，無--會落衰。」

春吉屁甲喙角專泡，彼幾個是五府千歲降駕專工揀的，聖誕時欲跳「八家將」的。簡單講，in就是神明的護駕啦！換做咱人來講，就敢若，彼號大官虎的『隨扈』。

明仔聽甲戇神去，心內咧想，神明降旨的，毋就足颺的，準若加入陣頭……！明仔開始離經烏白戇想，跼踏咧，身軀越咧，搖咧，陣頭排落去……！

春吉看明仔若著猴咧，對頭殼湍就共敲落去，警姦擣「未曾燒香，就砵砵拜」神尊猶未降駕，你這箍控神就咧起童。若憑頭算嘛輪袂到你遐，睏罔睏，莫眠夢矣啦！莫怪人喊你鐵骨仔明，煞連頭殼嘛tīng砵砵。

想欲佇遮行踏，較捷來盤擱，對宮主較巴結咧，伊是這箍螺的頭人，毋但有錢，人閤蓋慷慨，有好空的嘛會報你趁，若綴雄仔仙喔！上衰湍的漚跼數，準行路工嘛猶有便當通掙，薰、檳榔澹焦據在你食。

明仔頭殼抓抓咧！仙想就想無，一間無蓋大間的宮廟，呔會錢水遐活？

明仔一箍直直的，三不五時仔，就幹來liù-liù咧，橫直，冊也讀無一箍honn，阿公留的田園，莫貧憐hooH，攏枵袂死，做園的，冊讀遐濟，番薯伶塗豆也袂變較大粒。

這款戇直無彎曲的個性，煞成做予人利用的棋子，一葩本底單純的人生，一改的戇想，共日子揀入烏天暗地的磅空內。

春吉一支喙是糊癩癩，佇宮主遐嗤舞嗤吡「老大的，這箍明仔，數想欲人來宮裡，閣想欲跳將……？」

雄仔目睷激微微，喙角翹翹「真好啊！宮裡幕後的公司，當需要這號忠直的跤手，春吉你聽有無？輕重擲節一下。」

雄仔佇遮做宮主扞頭，有遐年矣，庄仔頭內外，烏的、白的交陪透透，盤擱甲真齊勻，表面是慈眉善目的宮主，背後……？

佇庄仔頭，替人消災解厄，收驚鎮煞，逐家攏稱呼伊「雄仔仙」，嘛有影真聖，囡仔著驚嘛嘛吼，大人煞著、歹睏癖的，來宮裡三機香thiat-thiat--leh，符令催落去，爐丹泡陰陽水淋落去，彼暝囡仔都乖ioh-ioh，大人爐丹揀兩包子，睏甲落眠兼會鼾。逐家對雄仔是信甲覆覆覆。

雄仔吩咐春吉，去共明仔tshuā來，教伊按怎看頭看尾，目睷擎較金咧，工課的鉸鉸角角，看範勢編派。

雄仔，小沖仔罐水筆勻勻仔筴，茶那鼻芳那tsáp，目尾擢懸，掠春吉看一下，手掰咧，春吉目頭巧，隨隨退出辦公室。

廟埕炮仔聲phing-phing-piàng-piàng，明仔這站仔佇宮裡，原仔學袂少道教的科儀，今仔日各庄頭，請神尊進香賀獻，鬧熱滾滾，弟子領烏令旗進駕，奉請神尊過爐入廟，「進ooh！進ooh！」，隨後靈乩比手畫刀，喙裡趲趲唸，彼號人聽無的「天語」，童乩抄五寶獻駕，明仔雖然無跳將，毋過，開始綴宮的陣頭出出入入，嘛感覺真颯，繼落綴人薰咬咧，檳榔嘛哺甲喙角喙脣紅記記，腦海浮出八仙過海的雲景，若像，家己原仔踏出一個勢面矣。

明仔的爸仔母話話唸「你嘛較差不多咧，園的當咧收成，無閒tshih-tshih，規工浪遛噠，無甲一項正經的，恰彼陣毋成囡仔規嚟規黨，是毋通綴人佇遐舞豬舞狗heh。」

那卸扁擔頂的番薯籠，那共瓜笠仔吊咧壁頂，越輾轉，隨無看著囡仔影。

老翁婆仔，干焦這個後生爾爾，明仔個性較條直寡仔，毋過，猶算真乖有孝，這站仔哪會攏變款，仙講就袂伸揸，有當時仔，閣會恰序大人對拈huan-huan-gô。實在毋知欲按怎教起，冊嘛讀甲不答不七！

熟人矣，明仔16歲矣，序大中央四姑情，才勉強畢業。本底想講囡仔人，田穡無愛做，去市內綴in阿舅，師仔工罔汰，明仔煞激懶屍，喝袂振動，規工守咧宮廟，你兄我弟結規黨，序大千焦煩惱，嘛無伊法咧，走去市內揣囡仔的阿舅，鬥想有啥辦法無？

明仔in阿舅木生仔，稽頭那做那安慰規心亂操操的阿姊，「囡仔這馬當咧信，當咧迷，講啥攏加的啦。」

木生聽講彼間廟的宮主，正港有第二步七仔，規庄仔頭大人囡仔，逐家攏信甲覆覆覆，學跳將嘛毋是啥標代誌啦！「你恰姊夫，心頭先放予冗，未曾未就煩惱咧等，恬恬仔共觀察，我才央人探聽看咧，這箍雄仔是啥來路的。」

雖罔幾若個月矣，囡仔全款佇宮仔裡出出入入，表面看敢若無事無故平平靜靜，毋過，深loh-loh的暗流，寬寬仔佇咧下片滾絞瀟倚。

明仔開始綴遐的師兄弟，學跳將踏跔步。宮主吩咐司公忠仔，tshuā彼陣猴囡仔靜坐，欲聽候神尊降駕選乩身，明仔綴咧坐，目睷瞞瞞，毋過因為好玄，偷偷仔留一分目，用目尾咧偷巡，看有人咧搖，有的咧趖跳，比手佻畫刀，喙裡齣齣唸……！明仔猶拕無摠，雄雄予人用指頭仔，佇頭殼頂點三下，目睷一擊金，司公忠仔咧面前出劍指，趖跔齣蹄，大聲呃喉「大膽妖孽……thiat…thiat…！」明仔掣一下，猶毋知啥代，已經予兩個號做師兄的，對雙片的胙下空插起來。嚇一碗符仔水，繼落就茫茫渺渺毋知人矣。聽候精神時，倒佇宮主雄仔仙辦公廳的椅仔頂，想欲摔起來，煞軟kauh-kauh，規身軀攏失力。

「慢且peh起來，拄才神尊降駕（旨點），愛你日後成做護將，拄才是神尊來倚，共無清氣的物件thiat走。對這馬起，你就是神的『代言人』囉！愛好好仔誠心，替神尊救助眾生。」雄仔仙彼軀半節殍色的漢服，穿咧身軀頂，看起來閣較慈眉善目矣，明仔對心肝底起敬意。

信佻迷，是人性失去自我的開始，迷失的身魂，踳陰陽界線頂懸咧踏斗。

寢頭，明仔對田穡加加減減猶會鬥相共，這站仔，若像有魂無體的傀儡尪仔。隨在人弄，啥人講嘛攏聽袂入耳，楞楞搖搖幌幌的感覺，若神駕附體的現象，予香火薰甲烏面的神尊，成做明仔茫茫渺渺的靠岸。

雄仔仙咧明仔心中，袂輸是神尊的化身，啊若司公忠仔有影是一把真工夫的老先覺。

日子若行流水，明仔若無來宮裡，欸寡仔香火煙，規身軀攏袂四序，這陣少年猴囡仔，對宮的攏信甲覆覆覆，忠心無二主的信徒。

春吉咧雄仔的控制恰指示下，對明仔是呵咾甲會觸舌，「你有影無簡單呢！操五寶的架勢，宛然是天將下降，規陣師兄弟，後壁講你號做鐵骨明仔，真正是一粒一鐵骨的腳數。」

「雄仔仙有吩咐，這馬外口事，會當tshuā你參與矣，你愛較目頭巧咧。萬項看事辦事」。吉仔薰那嘆，目尾掠明仔偷眇一下。

明仔出喙共吉仔探，雄仔仙外口人面遐爾闊，出入有烏有白，錢水嘛蓋活，到底是做啥生理？

吉仔聲嗽起歹，教示明仔，出來外口盤擱，愛學會曉目頭巧，喙激恬恬，雄仔仙是看你好牽教，毋才，冗早予你綴我出來送貨。閣再講，以雄仔仙的頭面，踎四界的名聲，敢有可能做歹代？

明仔頭殼抓抓咧，心內咧想，若講著仙的，是有影攏咧助贊人，佇宮裡出入的人，攏是地方的頭人，議員、檢的、巡佐，雖然烏社會出入嘛真濟，不而過，攏是來泡茶開講，有影是想傷濟矣。

送茶米，烏的、白的、各機關攏有，日子平平靜靜，閣有錢好趁，日後，爸仔母就免吹風曝日做粗穢矣。明仔路那行那在，範頭屈勢膽頭攏齊齊齊囉！

宮裡的辦公室，來兩個毋捌看過的生銹面，雄仔嘛全款老神在在泡茶恬聽……！

兩個人輪流開喙，對雄仔戳咧，戳咧。

「這擺接貨愛換手矣。」

船下禮拜倚咧南寮漁港，阮這片有兩個坐桶仔¹的阿陸仔，對這方面真熟手，這擺有較特殊的尪仔物，一隻原裝拆組的新車²，物件新閣幼膩，內容是一母一團³恰五磚⁴，派一个較穩的，膽頭較在的，負責揸錢去接貨，引入港，賄的拆貨、驗貨、新車重組，阿陸仔會負責，尪仔物是這改拄上任的議長欲收的。這幾冬若毋是in咧護航，咱茶米管仔底，彼層做手的祕密，哪有法度遮爾仔順序佇咧四界放，閣再講辦入來的錢項，逐家攏食有著！敢毋是……？

冷冷輕微的笑聲咧房間內籬蘆。

雄仔目尾擡懸，喙角轉笑，頭頔咧，頔咧，茶甌捧起來，佇彼兩個人面前巡過，一喙予焦，甌仔園落，指頭仔佇桌頂輕輕仔硃兩下，代誌算食落來矣。

春吉倚踎外口，雄仔目睺向四界小瞭咧，攞手叫伊入來「這擺港口接接的代誌，交予你去辦，順繼共明仔tshuā去，看生理的表皮是按怎交易，小點拄一下仔就好。」

雄仔對桌仔咬揸一咬皮箱，抹予春吉「內面的紙一疊一疊攏算好勢矣，愛按怎辦，你應該真清楚。」

彼台烏色1800CC的Tayota，是明仔滿18歲生日，雄仔仙送的。

雄仔仙攏真佻遮的囡仔，出手大範，所致吩咐的事項，逐家攏毋敢潦草，明仔嘛感覺天地愈植愈闊。

這幾冬明仔攞真巴結，綴忠仔辦宮裡，大大細細的代誌，迎神尊過爐火，三不五時雄仔仙吩咐，去指定的所在送茶米，日子算平平仔，錢額嘛毋捌重耽過，明仔的序大，看咧目睷內，猶原無啥會放心，心內懷疑干焦宮廟的收入恰茶米買賣，逐个囡仔出手攞真鑠命，這馬囡仔生日，送一台車？

明仔的爸仔母愈想愈生驚，心肝拏驚驚，拜佛求神，心猶是袂定安，tsuánn綴人去「南鯤鯓」代天府進香，聽講跋柁求籤足靈聖的。

序大人向望有拜有保庇，求一个平安符，嘛抽籤問前途，央請廟公解籤詩，丙申第17籤『龐涓死在馬陵道』。明仔的老母聽廟公講煞，心頭嚟一趲，頭眩目暗，哪會按呢？敢是真正行著「卯字運」，這支籤毋管問啥，攞是下下籤。

明仔的老母，轉去厝裡，三姑情四拜託，愛明仔緊離開彼个箍仔，毋通閣綴雄仔仙in佇咧出出入入，檢采出代誌。

明仔無啥歡喜，大聲應in老母「迷信」。

「啊好！啊好！你這箍戇团，活欲予你氣死，罵我迷信，你咧，你咧，佇宮廟綴雄仔仙辦事，煞罵老母迷信，有影，天地顛倒反矣呢。」明仔的老母氣phut-phut，大氣喘袂離，頭殼直幌「了然喔，去了了矣啦……！」

明仔感覺真煩，行到車邊閣越頭對in母仔講「遐濟冬矣，底時去做歹代誌，莫聽人咧烏白會啦！」

宮內的辦公室，電火點甲光映映，規陣人佇遐嘻嘻嘩嘩，雄仔攞手喊春吉恰明仔入來，共規陣猴囡仔趕出去，門闔倚，對明仔吩咐「佇我遮原仔幾

若冬矣，你巧閣好央教，嘛予人會信任得，有一攤生理，你參春吉去處理，代誌春吉會共你講。」

春吉勻勻仔共明仔，半交代半諷仙「牽龜落漚」。

「Hannh--按呢是犯法的呢！走私？」

HooH你是驚啥啦！這幾冬敢捌予你食過kenn，每一項毋是攏順順順，何況也毋是啥物歹物仔！

「無hooH，我是干焦替雄仔仙咧送貨恰辦宮內事，哪會臨時臨曜變按呢？」明仔小可仔著生驚。

春吉大聲笑兼警姦橋，siáu體明仔頭殼tīng甲若鞏紅毛塗咧。古早人講的：「馬無野草袂肥，人無橫財袂富。」閣再講，這隻船你早早都已經踏入來矣。這馬激外外，想欲跳船抑是靠岸，現此時，是無可能的代誌。

干焦是提錢換貨爾爾，賄的也無你的代矣啦！何況雄仔仙是看你會交仗得，才敢放工課予你辦，你煞咧挨推，遮濟冬矣！敢捌予你食虧過？代誌真單純啦！頂頭的人欲捏的物件，卡咧身份無方便出面，才央雄仔仙備辦，咱一路來，出出入入的貨，攏是in咧護航，無……你當做雄仔仙家己會印銀票hioh，是無？錢毋是沙螺仔殼呢！清彩杯就有矣呢！

明仔頭殼佇咧轉捩心綴咧掉反，嘛有影啦！遐爾濟冬矣，確實是無事無故，家己想甲傷複雜矣，地方的頭人，生成有三不便的時，掙錢換貨做交易，嘛是正常代啦。春吉咧邊仔用心計較，有喙講甲無瀾，捋平明仔的躊躇，明仔倒想正想，嘛共懷疑的心放下。

一膽二力三工夫，明仔一路來攞是咧替手，雖然毋捌加問盤話生話屎。毋過，心內按算揣適當的時機退場，外口人咧傳的沙屑話，總是「無風不起浪」，這號閃法律縫的代誌，暗路行久，緊縫慢會燬空，雖然無足清楚掩揜的內情，心內總是忤忤。

明仔的阿舅嘛探聽著風聲「彼个雄仔喔！」較早做猴囡仔的時，綴一个香港的老大的，佇泰國舞烏的，聽講有沐粉伶銃枝的代誌，閣佇澳門彼帶顧筊間兼挨筊，轉來臺灣咧北部整筊敲烏子⁵，敢若是跋歹筊的款，去予人扶跤骨扶無斷，賭半條命走路覷風頭，才會屈佇中南部假仙，總講無好底啦！毋過是誠久矣啦！人喊罔喊，無親目看著，攞袂準算矣！無的確是人咧欺雞娃怙懣的！何況這馬按怎看，攞是咧助贊辦事的好人。

年欲倚矣，明仔佇咧想，毋管是真是假，是好是穠，攞想欲冗早抽退，免予序大袂食袂暍的，雄仔彼對江湖目小瞭咧都知知，輕聲細說共明仔慢咧，拍一枝薰共安搭落來「有啥代誌，聽候年後才參詳，少年人，眼光愛放較遠咧，莫想傷濟，飯生成愛食，水愛啣，路嘛就愛行。」

這站仔，明仔定定感覺懶懶瘡瘡矣，若予雄仔仙thiat-thiat--leh，踎宮的房間靜坐成點鐘仔，神魂伶精神連鞭就百倍矣，神尊的力量，確實是袂嚟湫得。

年到矣，宮裡出入的人閣較濟，進香的，拜訪的，若水湧咧，一湧溢過一湧。元宵過了後，這個新正嘛算尾聲矣。

雄仔喊明仔入來辦公室「你想欲離開遮，實在講誠毋甘，嘛袂當勉強，毋過，咧欲走進前，閣替手一擺工課，全款提錢換貨爾爾。代誌辦好，你就

聽好收煞，轉去做序大的好囡兒。你有想好勢無？緣份有起有落啦！好好來嘛著愛好好仔結尾，你講著無？」

明仔慧忠的個性，一聲就隨應「好」。橫直遮濟年矣，閃咧，閃咧，逐漸就船過水無痕矣！

人生的拄搪，僥得按算，有時若棋盤頂的子仔，據在人徙，閣較黑暗的代誌嘛攏會發生，人心比惡鬼較驚人，人欲食人的時，比禽獸閣較不如，連骨頭嘛煞哺吞落去。

雄仔神色穩在穩在，電話中簡單兩、三句「攏攢好矣，咱是愛錢恰路草，in是愛成績恰地位兼拆利純，這幾冬該算的，該交的，攏照品照行。」電話掛斷，雄仔點一枝薰，大大力欸一喙，目頭結結，勻勻仔共薰煙一絲仔一絲吐出來。

明仔照吩咐去做，這擺換咧梧棲港內做交易？呔會揀咧遮爾明顯的所在？春吉恰明仔本底攏是一對手，臨欲出門煞四界揣無春吉，明仔感覺家己熟手熟手矣，車紡咧對港口去，倚咧揷貼的所在，共大燈切化，聽候約束的時間，緊猛一手交錢一手交貨，物件mooh上車後斗，車隨紡離開現場。

駛到半路，明仔頭改共接接的物件，偷偷仔拍開看覓咧，「散裝的銃？白粉？」明仔頓蹬一下，規个頭殼攏麻去，規身軀攏拚清汗，心肝起滾絞真袂安，扭掠繼手共物件炭密，後斗隨緊關峇，雖然捌看雄仔「現馬⁶」，毋過家己毋捌去沐著，明仔按怎嘛想袂到，物件會對家己手裡盤交，車駛咧緊猛蹺翻頭欲紡走，雄雄幾若逝光線炤過來，『別動，警察臨檢，證件拿出來，把後車廂打開。』

『巡佐，是槍還有粉狀的東西，可能是毒品？』

警察共配銃擰出來，扭咧明仔的尻脊後『證件交出來，手放頭上，現在以違反軍械毒品管制條例，現行犯逮捕你，你可以保持緘默，現在所說的，將成為呈堂證供。』

警察局地下室的審問室，燈火拍通光，一暝的審問，明仔啞口誓死罔，無話無句，心凝甲目屎涌涌津，家己癱頭，現扭現的證據，按怎嘛掰袂離，一路是家己咧騙家己，目睷一蕊金一蕊瞞，才會成做遮的頭人，搵咧手內舞弄的傀儡尪仔兼替死鬼。

「春吉無彩咱是穿開跤褲仔，做伙大漢的，你煞參雄仔共我揀入地獄。」明仔發覺家己連存後步的機會嘛無。

雄仔tshuā律師來矣，據在明仔按怎喝冤枉，人證物證齊齊，按怎嘛掰袂離，律師是雄仔倩來的，佇禁閉室面會時，律師傳達雄仔的話，愛明仔共代誌擔起來「外口的代誌，包括恁序大攏會照顧甲好勢好勢。」

律師聲喉輕輕仔，話意重重仔「口供若烏白講無對同，拖愈濟人是傷愈重，後壁摸出來的是規米籬，一个食罪總攬，省咧予地方起滾絞，地動搖袂煞，若乖乖行事，拍官司的代誌，會爭取法律縫，罪刑會判較輕咧。無……恁序大咧外面的安全，嘛無人會當保證萬事攏平順，你猶未想好勢進前，上好喙是紮較密咧，保持做啞口的。」

移徙地檢處，收押禁見，除了律師啥人嘛見袂著，明仔心肝結規毬，用序大做釣餌恐喝，有夠心雄手辣，干焦想著爸仔母的安全，家己這馬是

「籠中鳥」，連翼嘛無才調展，對雄仔咬牙切齒的怨恨，煞一點抵抗力嘛無……！敢講真正愛乖乖仔順口供坐罪，是無？

頭擺開庭，明仔大聲呢喉喝冤枉。律師已經跋明的，閣哀落去，無欲替明仔閃法律縫，明仔攏愣去矣，兩條重罪加起來是會當判死刑的。

律師來面會，教明仔該當按怎辦會「乖乖仔聽話，若借提刑口供，小忍咧，一句毋知，萬項無代，袂借提傷濟擺，頂頭會想辦法，你就共代誌攏揀予遐的阿陸仔，彼陣無身份的，早就揣無人矣。」明仔想欲講話，一下都予律師窒起來矣。

「乖乖聽話，你無案底，未滿20歲，盡量上訴，看會當判7年以上10年以下的有期徒刑無，上標的拍算是無期徒刑，極加是關十外冬矣，表現若好爭取級數，會當冗早申請假釋。」明仔聽律師講完，知影家己這盤棋，已經是死棋，小卒仔泅袂過河矣。

律師欲離開進前「Ooh--著啦，恁阿舅的倉庫，發生著火燒的意外，物件小可仔損失，人嘛略略仔傷著，目前，猶無啥代誌啦！毋過，雄仔仙嘛毋敢替恁規口灶掛無事牌，畢竟外面是山懸海闊，總有拍交落的時陣……！」

明仔的老母，總算會當面會矣。「戇团的，代誌哪會按呢生，你決定是冤枉的，著無？恁老爸煩甲袂食袂睏咧，血壓直直夯。」

看著老母面模攏塌落矣，閣聽講老爸破病，明仔目屎輾輾轉，喉湏煞應袂出聲，干焦頭犁犁，頭殼直直搖。心內咧想「反口供，共所有的人攏咬入來，一拮若粽，敢會較贏面？」

律師無意仔無意的話，若像咧安搭，嘛敢若咧恐喝，僥得坐底的心神，明仔知影，早早都予人縛枝骨仔，閣抗辯嘛是孫悟空反袂出如來佛掌，極加是掠春吉做伙死爾爾，反絞的心，予一領坎過一領的蜘蛛網，闌甲烏烏暗暗，上尾仔選擇一個人坐罪矣。

編號2347號，陳光明……！違反「毒品危害防制條例」第十條第一項，一審判刑「有期徒刑7年」，「銃炮彈藥刀械管制條例」第七條第一項判「無期徒刑」，褫奪公權終身，全案會當上訴。

老翁婆仔聽著明仔的審判，真正是「火燒厝寮，全無網矣」當場倚袂牢tsuánn蠅落去。

明仔的老母，走去揣雄仔理論「好好囡仔，哪會佇你遮走精去，閣觸犯這號重罪，兇手一定是你sái-sù--á，猶有春吉一定知情的，恁攏是共犯。」

雄仔老神在在，文文仔笑，口氣平平仔「恁明仔有可能是佇外口予人利用去。囡仔綴我遮爾久矣，一定會想辦法救伊，倩較gâu的律師閣上訴……！啊若春吉你就愛去問伊囉……！」

兩個老翁婆，從出從入，捎無寮仔門，揣無人通救明仔，懷疑囡仔為啥物欲認罪，家己生的囡，相信袂去做這款戇代誌，就算愛我賣田賣園，嘛欲佻法律揸拚落去，行到這個地步，有影是進無路，退無步矣，田園嘛囡咧拋荒矣。家己閣倩律師，一擺來一擺去，干焦是散銀票爾爾。二審，三審定讞，上訴駁回，維持原判。

法庭外，明仔的老母瓜笠仔戴咧，擲一支央人寫的紙牌仔，兩字大大字的「冤枉」，一支大雨傘tshāi咧日頭跼，遮開煩惱甲中風坐輪椅的老翁。

法警來苦勸in緊離開，過路有同情的贊聲，嘛有譬相的言語。對法庭行出的，有「更生人協會」的人，有「國民法官」，嘛有「厚話的記者」，兩個老人若戲齣裡，悲情的角色，一工過一工，閣較堅心的向望，嘛予日頭溶了了去矣，天公伯仔啊……！

一个身影聞咧目睷前「阿姆你按呢是干焦了戇工爾爾。」我是法律系畢業的實習志工，嘛是「被害人保護協會」的人，這是我的志工證，我號做「蔡瑞美」，佢後生的案件新聞有報，我嘛有共更生人協會探聽過，案件是現行犯，證據現拄現，按怎嘛無法度講佢囡是無罪冤枉的。

「阿姆我袂害佢啦！」

瑞美出手欲共明仔in老母對塗跤牽起來。

明仔in老母，目神惡khiak-khiak共瑞美的手大力掰開「佢攏是歹人仝黨的，我無咧信篤佢。」

幾若擺的苦勸，明仔in老母擔頭共瑞美相相咧，目神漸漸放軟，心內猶半懷疑，罕得有人是遮爾仔善心的「小姐你正港是好人，是無？愛按怎做才有法度幫助阮囡？」微微的老歲仔目，目屎恰鼻瀾潯規面。

瑞美用專業的態度，軟略的話語「阿姆你愛堅強，予伊佇內底好好接受刑期，伊上大的掛礙是序大，毋管法律按怎裁決，攏愛面對現實，人生若溪渡咧，是彎是直攏愛靠家己渡，探監時愛鼓勵明仔共日子园tuà未來，猶未成年咧，好好接受制裁，未來的路閣真長真闊，你愛健健康康活咧，才有法度提振伊的信心恰責任，獄內有真濟開破心理的醫師，牧師恰佛教的師父，

攞會幫贊伊。表現若好，刑期決定會減少，準若伊出獄時，啥物攞是空的，未來的路敢行會落去……？」

明仔in老母勻勻仔共話聽入耳「明仔……我的乖囡心肝戇囡啊！」擰頭向天，目屎倒吞喉，想著明仔細漢佇搖筍內，胖奶古錐的面模仔，搖啊！搖啊！荏荏的身影揀振動無食油的輪椅，沿路明仔in老爸佻輪仔聲，同齊inn-inn-onn-onn，寬寬仔消失佇法院的路尾……。

春吉驚明仔共供出來，旋甲裂褲跤，畢竟是伊牽明仔入來箍仔內。雖然知影物件做手的內情，毋過，這擺掠交替，春吉全然毋知影，心內對雄仔也驚也怨，閣共兄弟揀入萬底深坑。

春吉足怨感家己，想袂到雄仔驚代誌焮空牽拖傷濟人，閣牽對宮的來，使雄辣的手段，靠頭人共外面的話攞壓落來。

明仔想著序大的安全，閣想著春吉嘛有序大的壓力，雖然予人揀入虎口，斯當時這逝路是家己強邀來的，「目睷看糶，跤踏火」，知疼已經走袂離矣。一个人揸，省咧拖規棺，所致無共春吉供出來。

雄仔驚春吉佇外面講話落勾，撥轉來電甲金鑲鑲。

春吉想欲替明仔講話，雄仔起呸面，出手閣較粗殘，共春吉當做野狗，會哀損甲袂哀，扶斷一支跤骨，跛咧，幌咧，變做癩跛破相。

雄仔煞尾閣警告春吉「毋通傷白目，家己揸金斗甕仔，閣想欲替人看風水。共恁爸的話聽清楚，我雄仔佇四界行踏，出門是尻脊後揸一副棺柴……！就是毋驚死啦！看是你骨頭較tīng，猶是我命較硬！」

遐濟冬矣，春吉想欲去共明仔面會，攏提袂出勇氣，明仔嘛無想欲見伊。

明仔官司的判決，對陳家來講是弄家散宅矣。

明仔的老爸這兩冬從出從入，tsuánn中風帶身命，規个身體攏敗去矣，冬風sng-sng-kiò，冷寒嘛共明仔in一家口仔，gàn斷心穎，一路行來，厭氣絕望的心，坐落生冷的鼓井底，觸袂著明仔載的日頭光，氣絲仔愈來愈短……！

明仔予人跤銬手銬，押轉來共老爸燒香送山，這馬想啥嘛攏袂赴矣，閣較濟的懊惱嘛只賭一場空笑夢，家己的戇條直，嘛算是罪有應得，現行犯按怎嘛掰袂離，雖然有百般的委屈，為著老母的安全，心內喝家己愛堅強落去。

「人生若無一擺戇，路邊哪有有應公。」

予人拆破的人生，賭一張無路的地圖……。

13冬過去矣，申請假釋，一擺二擺……總統上任，全國刑犯減刑特赦，明仔坐監時表現優良，特赦有著，足足15冬矣。

「陳光明今仔日出獄矣。轉去愛好好仔做人，毋通閣行回頭路，行出去莫越頭。」看守仔好聲好說吩咐。

門一下拍開，迓過自由的戶櫳，無仝的日頭光，無仝的空氣，遠遠行倚

來的形影，一部白梳梳的頭髮，瘦瘦的形影，明仔緊猛踏倚共攬牢。老母瘦薄搖掣的肩胛，千聲萬句講袂出喙，干焦梢聲的一句「心肝仔囡」。

明仔跪咧吼「阿母……原諒我這個不孝囡。」

老瓦厝看著閣較老矣，必巡的磚仔跡，若像明仔佇籬仔內，一逝閣一逝敲袂峇的空喙。

換一軀新衫迺過烘爐，一碗豬跤麵線無法度入喙，雙跤跪咧公媽廳共老爸磕頭懺悔，15冬矣，「阿爸我轉來矣。」

門口埕一个熟似的形影，跛咧跛咧，行倚來……！「春吉？」

「鐵骨的，是我啦！攏是我春吉無滿效，才會害你去食罪啦！」毋知in是欲縛枝骨仔，掠你做替死鬼，若知影袂按呢害你！佇雄仔面前想欲替你講話。無疑悟，煞予損斷跤骨變做破相的。

這15冬來，春吉活甲若無滿效的龜仔囡，顧慮爸仔母的安全，毋敢共代誌搯搯出來。看明仔風霜的面模仔，閣向頭看家己癩跛破相，滿腹糾絞的怨恨，心內咒重誓「這葩冤仇定著愛討的，做一斗共款予清氣。」

明仔瞪目神，聽春吉講話，若咧放曲盤「雄仔佇宮裡，掛羊頭賣狗肉，大人囡仔來宮裡，爐丹吹會遐好用，內底攏囡安眠劑，平時佇送貨過手的，表面是茶米，下層是藏白粉。」

春吉當初戇想，想講家己無沐就好矣，啥知影機關是暗漠漠，佇咧靜坐的房間，香煙，冷氣攏囡『安非他命』咧毒毒，莫怪逐家精神會遐爾好，若

無去人就起懶矣，攞是毒品咧作怪。落尾，無想到in會愈做愈大攤，牽明仔來，嘛無想講會共害甲遮爾慘，閤掠去坐罪。

春吉鼻瀾涌涌津，吼甲喉渴「15冬來，逐工就活甲生不如死，就是欲等你明仔轉來，予你知影因端，這馬轉來矣，我這箍糞埤兄弟，橫直序大去做神矣，已經無啥好掛慮矣。」

雄仔這馬衝甲掠袂牢，議員拄落任爾爾，繼落欲選立委，烏白相濫的垃圾代「你庫我庫迴公庫。」褲橐仔是油洗洗。

春吉愛明仔好好保重「35歲爾爾，人生猶有機會咧。」跛咧，跛咧的背影，搖搖幌幌愈行愈遠。

明仔大聲嚷「一步錯，步步錯。失去的，敢討會轉來？僥得面對的人生，彼葩炤光的路燈佇佗位？」

明仔共薰盒擲扁，潑拉儂的人生路，敢行會出去，若矜簷跤的薰頭，綴風四界輾，雄仔這箍不仁不義的精牲，借神明的名義，為非慘做，無所不至，一定會有報應的，毋是毋報，只是時機未到。

庄仔頭的大路口，已經變做產業道路矣，厝裡祖公仔放落來的田園，攞甲無看著影跡，聽講是彼陣大官虎食去矣。

路口車鼓陣，lòng-lòng-kiò，炮仔聲ping-ping-pòng-pòng，放送頭大聲鼓舞，立法委員候選人「1號，1號，吳天雄，吳天雄」敬請鄉親序大，父老兄弟姊妹，予天雄繼續為地方發展拍拚，服務鄉親。

愈倚頓票的日子，路頭路尾拜票聲，一陣奢颺過一陣，佢雄仔面對面，明仔足想欲共敲落去。

15冬的監禁，換雄仔這陣的囂俳。

明仔閣想著老母，想著家己猶是咧「假釋保護管束」期，拳頭拇捏緬緬，捏甲強欲出汁，硬吞忍落來。

「明仔，轉來矣hooh，定著愛揣時間共你洗塵一下，等選煞，你愛知喔，我是一定會高票當選的，時到你閣來綴我，這馬勢面無全矣，我袂予你克虧，會補償你十幾冬的犧牲。」雄仔一身軀的穿插，掛甲金鑲鑲，擎紮的西裝，人款仔人款，毋過，佇明仔的目矙內，就是一隻「衣冠禽獸」。

市仔口，人是挨挨kheh-kheh，買菜的，拜票的，絞甲鬧熱滾滾，吳天雄倚佇人陣中央，笑甲喙仔裂獅獅，眾人喝聲「中選，中選」，一聲銃聲，對雄仔的頭殼中心迴過，逐家驚甲heh-heh-kiò，人陣拍四散，救護車來到位時，雄仔倒佇塗跤，連振動嘛無……。

警方的對講機接著消息：「有一个叫王春吉的，自首投案，講拄才咧市仔口開銃拍死立委候選人吳天雄，局裡猶分袂清案情，王春吉提一个批橐仔，園咧報案櫃台，值班的警員才歪翻頭爾爾，自稱兇手的王春吉，對家己的頭殼開一銃。送到病院嘛無氣矣。」

新聞快報：「拄才菜市仔口，10：05分，登記1號立法委員候選人吳天雄，予不明人士，近距離開銃，彈對腦部，現此時，送佇（桃嘉署立病院），傷勢嚴重……！急救結果，已經無性命跡象矣。」

新聞快報：『根據中嘉二分局，刑事組詳述案情進展報導……！自稱行凶的案情關係人，目前在分局舉槍自盡，當場死亡，根據遺書自述（挾怨報仇），有關槍械來源，案情有待詳查，並釐清相關人士……！』

看著新聞快報，明仔規个攏愣去。

「春吉你這個毋成兄弟，哪會遮戇，遮衝碰啦！我坐罪總攬已經犧牲澈底矣，你戇甲提命來拄，攏毋值啦……！」明仔金金相電視循環的報導，凝甲家己捶心肝，雖然無插春吉，毋過，心內早就原諒伊矣。

明仔頭犁犁行向早前的宮廟，看著司公忠仔，托一支枋仔，碯咧，碯咧。

明仔出聲喝「忠仔」？

司公忠仔繩倚去，聽聲，用手欲挲……！

「忠仔」我明仔啦……！你的目睷忖會……？

「報應啦！」較早綴雄仔，都「紡膠⁷」「煉丹⁸」欸「安仔⁹」，精差無攞⁴號¹⁰仔，行水路爾爾，khau去「勒戒所」出入幾若擺，這馬強欲青盲矣，規身軀齊症頭，無地去啦！Ut咧遮等死。你去hông關了後，雄仔就開始共宮裡，彼陣猴囡仔拍散，刑事來問話，若關係你的代誌，攏掰甲離離離，無偌久就開始沐政治矣，有遐的頭人咧耒路，烏的欲汰白，緊甲若雲過月咧。

這齣舞甲逐家攏輸忝忝，關的關，死的死，逃的逃。

毋過，暗路行久原仔會拄著鬼啦！案情正有通舞咧，該死的，緊縊慢爾爾，攏走袂離矣啦。

司公忠喙裡那唸那警，聊聊仔挲壁邊行，伸手摸一條椅仔，叫明仔坐倚來「我這馬性命若風中燈，隨隨都化去，你拄轉來，偲得揣稽頭，規氣咱合齊，共宮的好好整頓，正範正氣共神尊的科儀發展落去，相信路若正，神明會幫贊咱。」

「同齊來訓練一陣正範的官將首，毋但會當排陣、表演，閣會使參加家將比賽，共較早歹名聲汰清氣，這馬時代無仝矣。屏東彼片燒王船，嘛是訓練5歲到12歲的囡仔，佇咧跳「五毒」的民俗文化表演，別人會當做，咱嘛會當重頭做起，傳炭臺灣藝陣文化。」忠仔枋仔大大力碯佇塗跤，若像咧對神明下願咒誓。

明仔薰咬咧行向厝前，坐跔戶橫想前前後後的代誌，一場無劇本的戲齣，若爍熾顯咧就過矣。

一盤棋，落尾手siáng上贏，無人料想會到的。

過去，若湧頭的水波幻影，明仔對家己講「勇敢行落去，胸坎撐懸，面對日頭光，才袂辜負所有的犧牲。」

司公忠仔雖罔做過諷仙仔兼lān-muā，毋過，確確實實有一把實腹的好工夫，明仔佇忠仔的牽教之下，共以早想欲跳將，彼粒燒唵唵的心法轉來，對踏三粒，踏七星基本步，用虔誠懺悔的心，共規套工夫綿爛款起來，成做起致的肥底，本底暗淡無光的心，寬寬仔燒烙起來，繼落來，編派小差爺，四將，四文官，二判官，真真正正文武合一的陣頭。

跤步踏出去，倒跤收入來，「落路」「龍虎包」「玲瓏走」「掠欽差」架勢大範，趖跳照步，一陣囡仔陣，綴明仔的喝咻聲，起跤弄步，排陣排甲歡頭喜面。

明仔佇「更生人保護協會」的促成下恰志工瑞美的幫贊，佇學校訓練「官將首」。進一步成做指導教練，調教「小小八家將」參與全國性的民俗藝術表演。

明仔點陳吩咐「開面」就袂使烏白講話矣，愛好好仔共跤步踏予在，提金牌轉來敬神尊喔！「小小八家將」加油囉……。

2012年，桃米國民學校，由陳光明教練tshuā頭，參加全國青少年八家將，官將首比賽，2017年奢颺行上「世大運」……。

「八家將」歹罔浪蕩的惡名，佇日子中洗汰，成做民俗藝術莊嚴的代表，予明仔矢志的心神，揣著炤路的光線。

「嘛愛感謝蔡瑞美的信心鼓舞」，明仔便若想著伊的文文仔的笑神，敢若軟晡的日光遐爾溫馴，予家己欲行向未來的目標閣較堅定。

明仔遏香跤插一枝薰，墊佇戶橫跤，向攏平的田園，大聲喝「春吉仔」我成功矣，你在天之靈，好好仔安眠矣，相信天會掠出公理……！

Kám-á-tiàm架仔頂的報紙，顯目的版面『吳天雄槍殺案……，顏xx議長等涉案人……！分別處以有期徒刑……！』明仔提報紙倚咧金金相繩甲神去，目箍澹甲霧去矣！

來來去去的恩恩怨怨，趨斜的路，若像一條擢袂伸的線逝。金錢、地位、人性的貪念，彼支「法律」的尺，法庭後面彼支代表「公正、公理」的秤仔，到底捌重耽過無？

時間、空間、惡恰善，摔反幾若十冬的人生，明仔現此時上清醒矣。

明仔共薰擲化擲掉，斜入簾簷的日影變甲真柔軟，一陣無仝節氣的風勢，共薰概仔恰報紙，愈紡愈遠……！

厝埕尾，一个幼秀的身影牽痾痾的阿母，愈行愈倚……！明仔喙仔開開，叫袂出時常佇心內拋擲的名「蔡瑞美……！」

註解

- 1.坐桶仔tsē-tháng-á／偷渡。
- 2.新車sin-tshia／新式手槍。
- 3.一母一罔tsit-bó tsit-kiánn／槍和子彈。
- 4.五磚gōo-tsng／五塊海洛英磚。
- 5.敲烏子khau-oo-jí／推牌九。
- 6.現馬hiān-bé／露出槍把。
- 7.紡膠pháng-ka/吸食強力膠。
- 8.煉丹liān-tan／嗑藥。
- 9.安仔an-á／安非他命。
- 10.攞4號tshiam 4-hō／施打毒品。